

張文襄公奏議

張文襄公全集卷二十一

奏議二十一

創設槍彈廠片

光緒十三年五月初三日

再廣東前因籌辦海防購運軍火兼濟滇桂後膛槍彈一項需用尤多採辦維艱必須購置機器自行製造始可取用不盡無庸倚藉外洋當經飭海防善後局委員在上海泰來洋行購運製造槍彈機器一副來粵價銀二萬五千九百八十餘兩正擬設廠開辦適前廣西撫臣潘鼎新亦在泰來洋行訂購槍彈機器一副由委員運解到粵時西省已將撤防准護理廣西撫臣李秉衡

咨商西省無力設局開辦所有前購機器請留東省備用復經飭局籌款將機器及造子銅片物料價值委員洋匠川資暨運腳保險等費由東撥給計共銀三萬一千三百餘兩當卽遴委江蘇補用知縣薛培榕會同地方官在於省城大北門外二十里番禺縣屬之石井墟購地三十一畝有奇創建製造槍彈廠一所地居省城後路較爲穩便上年九月經始本年五月落成計頭門一進公務廳兩進機器大廠一座鍋鑪打鐵烘銅殼造木箱裝子藥房共五處儲料發料庫各一另有裝蠟餅紙餅火藥等房及工匠住房廚房等二十餘間外加甄

牆一道高一丈周圍二百零四丈共支工料連地價銀一萬七千三百餘兩安設機器兩副能造毛瑟馬梯呢士乃得雲者士得四種槍彈試辦之初每日約造二千顆熟習之後每日可造八千顆目前即可試火開造此外尙有需用鎔銅輾銅等機器併應添蓋廠屋容俟陸續購辦

硃批該部議奏欽此

全瓊肅清分別裁留營勇通籌善後事宜摺

光緒十三年

年六月十三日

竊照瓊州黎客各匪自上年八月奏明大舉澈辦勦撫

兼施各路以次廓清惟南境崖州一隅黎歧怙惡負隅
未經戡定臣等前於本年二月奏報陵萬肅清進勦崖
黎摺內聲明趁此軍威策勵將士鼓勇深入以竟全功
欽奉硃批卽著張之洞等將勦撫各事宜妥籌辦理以
靖地方等因欽此當卽恭錄咨行欽遵辦理在案查南
林嶺黎巢在崖州之東一百六十里高峰深谷險峻異
常匪首譚亞吉與其黨吉文香等勾結附近各峒黎匪
據險結寨乘便四出擾害該峒黎恃其地遠山深歷年
屢抗官軍疊准提督馮子材咨報崖屬各黎歷經分別
撫諭各峒相繼薙髮歸誠惟該逆首譚亞吉謂官軍斷

難深入抗不受撫經馮子材卽派知府馮相榮馮相華等督率各營激勵將士由藤橋三亞一帶進兵山險水毒兵勇節節開通攀援而進募集土團以爲鄉導至三月十七日遊擊馮驊守備陳才業由蘿蓬嶺入山攻破南路賊柵十八日參將符堅高遊擊陳德成由大茅峒入山攻破東路賊柵進逼老巢適馮驊等南路官軍攻入復派道員楊玉書由紅花村小路入山與馮相榮馮相華所部會合並進冒險鏖鬪賊勢不支敗奔回巢拒守同日知縣石佩瓊守備蔡必壽等亦攻奪西路賊卡三座十九日馮相榮等親督各軍勇團攀崖踰澗四面

仰攻誓以必克該逆乘高死守槍石雨下勇丁頗有傷亡相持半日道員楊玉書多方激勵諸軍從山後攻進知縣沈寶光巡檢楊桂振等分軍賈勇猱進猛攻縱火該逆始行潰竄我軍登將南林老巢攻克先後殲斃悍賊二百餘名追擒匪黨二百餘名奪獲槍械及牛隻穀米無算惟逆首譚亞吉吉文香逃逸未獲連日馮相榮等督軍搜山四月初三日知縣蔡其銘於紅花峒拏獲吉文香一名閏四月二十五日馮相華蔡其銘督率弁勇躡及逆首譚亞吉於南林峒附近深谷中生擒解營驗明正法沈寶光先後拏獲卓五生藍亞對陳亞爛等

三名各弁勇搜山生擒毚生馬王用書二名殺斃符光清一名皆係著名積匪其大茅峒十二弓等數十村峒皆請繳械交匪均經楊玉書詳訊情節審察良莠分別誅釋不令稍有枉濫署崖州協副將方敬署崖州知州劉保林分派弁兵團勇搜捕各峒匪匪亦經斬獲多名崖境一律肅清此官軍破巢擒渠廓清崖境之實在情形也嗣因天熱瘴盛瓊地已無大股應勦之匪自宜撤兵節餉詳籌善後當於五月初四日電奏請旨飭馮子材統率萃軍仍回欽州原防瓊州善後由臣等督飭雷瓊道朱采籌辦欽奉電旨允行在案馮子材於奉旨後

還至瓊州府城與道府各官商酌一切卽於五月內凱
撤回欽查馮子材原統萃軍新舊各營並撥歸統率之
全字兩營共二十二底營現裁遣十七營陸續運送渡
海俟抵欽後分起給資裁撤酌留五營分防欽州邊界
并彈壓廉屬積匪瓊軍除撥歸署高廉道王之春兩營
帶赴東興外現經酌定方長華原統各營暨朱采新募
各營孫鴻勳所帶新福軍兩營重加選汰統名爲瓊軍
共成十底營分屬朱采及方長華統率調遣並合之在
籍總兵林宜華等所帶土勇士團辦理善後搜捕逸匪
撫安生歧培修道路已飭相度要隘分建碉卡以資控

制並經馮子材咨商酌定瓊郡各屬除文昌無黎外其餘十二州縣准各募勇五十名以資防緝此瓊郡勦匪事竣分別裁留勇營之實在情形也其各屬就撫各黎據道員方長華楊玉書知府謙貴同知孫鴻勳等稟報除以前就撫各戶口外南路崖州新撫丁口二萬三千餘尙未報齊中西兩路瓊山定安儋州昌化感恩等處陸續就撫丁口十萬三千餘東路萬州陵水尙未報齊其間本係生黎者十之七本係熟黎而歷年頑梗化爲生黎者十之七均已薙髮改裝造冊編戶其附近新開大路者逐漸推廣化導招徠至深山生歧旣不出爲民

害亦不致阻礙商路鑛山處所則聽其踰伏孽生不復過問前奏定開闢大路十二道經西路道員方長華東路道員楊玉書北路同知孫鴻勳南路署崖州協副將方敬署崖州知州劉保林等各照前奏分定地段督率弁勇團夫設法開鑿均皆依限開通四面交會聯接皆可達於五指山下同知孫鴻勳國子監典簿韓方炳知縣周林皆親至五指山繪具該山形勢道里甚爲詳晰各段間有黎峒梗阻之處經各該員宣諭激賞恩威並用以次一律暢通合併接算計所開通道路共三千六百餘里此外復勸督各州縣團紳另開小路萬州五道

一由中興市至樂會五村一由番葛坡至陵水黎萬嶺
門一由金雞寮至分界水一由黃麋坡至深田一由西
峒至長沙陵水三道一由馬嶺弓至七指嶺一由文村
弓至寶停司一由北渡溪至藤橋市定安四道一由打
運至三坎溪一由銅甲口至牙打一由新興坡至打喃
們一由新興坡至牛欄坪崖州二道一由郎婁汛至官
坊河一由抱懷村至樂安所澄邁二道一由岑崙墟至
臨高垂南村一由岑崙墟至瓊山那略大溪儋州一道
由塘源市至元門峒臨高一道由蘭洋市至加嘉村感
恩一道由北黎村至古振州昌化一道由縣城南經大

田黎峒亦至古振州樂會一道自陽江市至黃村會同一道由石壁溝至萬州什密村共開小路二十二條均已與大路接合疊經臣等委員密勘官開各路林莽芟除山石開鑿輿馬俱可暢行者十得其五餘或限於地勢或迫於日期未能依前定丈尺開足已飭俟秋涼後隨地召募土黎設法轟鑿增修多造堅固木橋務令一律寬通并於衝要平坦處所搭蓋棚寮設立墟市以便商旅往來此各黎就撫造冊及原定大小各路一律開通之實在情形也查瓊州孤懸海外黎客交証股數紛雜地方苦瘠憑藉無資其難易與臺灣判若霄壤特以

連年黎客寇掠民不聊生逼近越疆海防尤亟臣等恪
遵光緒十二年正月二十二日所奉綢繆未雨化導獠
狃之諭旨力籌餉需拊循將士堅持定見竭力圖維不
敢畏難自阻現在勦匪諸事略定其善後事宜大要約
有數端一移民墾田黎山旣通以後查其田土皆屬饒
腴土煖雨多一歲三熟遠勝於瓊屬山外州縣除有名
諸嶺而外多係坡坂縣延可資種植卽山谷之中亦多
產佳藥材木並無荒崖棄土計現在人跡可到可耕者
何止數十餘萬畝種禾種薯種藍種蔗無所不宜聽民
自便文昌縣人稠田少每年出洋趁工服賈者甚多已

飭縣出示曉諭民人願入山墾種者聽其自擇地段認墾報官勘明給照三年內免其升科並令文昌團紳副將符鴻升廣爲勸導他縣民人願往開墾者一律辦理民情甚爲踴躍數年之後瓊地米穀日多閒民日少庶於本務不無裨益一招商伐木商務以林木爲大宗現飭朱采於撫黎局內附設招商局開采山木並委發粵差委記名提督謝鴻章貴州候補知府席時熙專辦招商伐木事務略分官辦商辦二法官辦則派員率帶土勇深入老山無論良材雜樹一律砍伐成材者堆積溪河兩岸轉售商人叢雜者一併芟除亦可充搭棚蓋屋

爲薪之用藉以豁其陰霾消其瘴氣商辦則指定何山限以四至先給護照始令開采官山量材納稅黎產公平價買現粵商分赴定安萬州崖州等處勘得近河道處山林極夥尙可設法運出集股前往者絡繹不絕一助商開鑛黎境各峒有五金鑛者甚多惟昌化所屬大豔山銅鑛最旺銅苗上洩多產石綠故亦名石綠山府志名爲峻靈山宋以來卽稱其山常有寶氣嘉慶三年曾經督撫臣奏請開采鼓鑄以省遠運滇銅同治四年有西人與香山監生林騰漢私議欲開此鑛經前督臣瑞麟查知照約阻止現有香山職員張廷鈞集資往開

募黎作工經營已及兩年機器現亦購到察其鑛苗確
係豐美現經設法鼓舞開通並許由縣營力爲保護免
致土黎索擾目前粵省正在設局鑄錢如此鑛暢旺鑄
錢卽可取資瓊產可免外購洋銅大率材木之利在一
年以後墾田之利在兩年以後銅鑛之利在三年以後
雖不能驟致富庶總可期瓊地商民生計日裕公家亦
資其益庶不致以一切經營全行仰給內地一設官之
制疊次與馮子材方長華等函牘籌商博采眾議僉謂
新經開通處所凡形勢衝要距城遼遠之區如定安之
十萬峒萬州之什密峒定安控凡陽感恩之古振州崖

州之大本弓瓊山之水會所等處皆須設官旣以彈壓
黎村兼防土團擾害並經理開墾招商修路諸事方不
致通者復阻此六處均應量設同知通判州判縣丞等
官并移置營汛惟目前經費未裕地利未開瘴氛未淨
應暫派委員及帶勇將弁就以上各處駐紮經理以後
體察情形或增或移徐圖建置至生黎各峒前明以來
多設有世襲總管類皆刁黠貪橫平日則苛虐黎人伺
便則勾結外匪突出劫掠此後應卽一律革除擇循謹
者派爲村長峒長所轄村峒多者酌給頂戴予以把總
外委等職銜由地方官選黜不准世襲責令奉法緝匪

免致負固爲亂一除弊化俗各黎性固愚獷亦甚樸魯
平日每爲奸民剝削尤應加意體恤查知黎村糧賦向
來不免爲蠹胥地棍抑勒欺蒙現據署崖州知州劉保
林稟稱已查明量加核減復經嚴飭各屬一律查核力
除苛累如有奸商欺騙盤剝團勇擾索奸民誣害一併
嚴行懲辦其建立義學一節萬州已設有六處此外各
州縣飭令一律酌辦先令粗通華語略識漢文宣講聖
諭廣訓使知禮義法度之大端且免爲奸民所愚至客
匪一項自上年秋冬以來歷經方長華派軍查拏勒交
正法者一百餘名惟客強士弱積憾過深而客民賦性

凶很官軍一撤難保不糾眾報復現經方長華飭地方
官傳集土客各紳剴切勸諭解釋宿嫌查有漏網未獲
之客匪網送者給賞容隱者連坐若土人仇殺誣陷者
亦必按律治罪土村匪徒一律清釐懲辦但目前尙須
兵威彈壓方能責令遵守其有悍暴客民習慣生事者
貸其一死勒令攜家離瓊不容逗遛先除其敗類繼之
以持平庶可經久相安以上善後各事宜當督飭雷瓊
道朱采次第切實籌辦陸續具奏此又現在撫綏良黎
輯和土客通籌善後之實在情形也臣等查崖州爲瓊
南瘴癘最重之區而南林一嶺山深水毒尤爲險惡楊

玉書督軍攻克逆巢後旋卽感瘴身故其餘員弁勇丁
病歿者不少卒能備歷艱險克竟全功論其攻戰斬獲
則不如大股外寇之多論其艱苦病困則難於內地十
倍此由懿旨優渥珍藥遙頒將士等感戴聖恩歡聲雷
動馮子材親駐瘴鄉令其子弟深入絕險故各營先登
效命益復奮往無前此次攻克崖境堅巢生擒首逆各
路員弁冒瘴鑿險撫定生黎分開道路闔郡暢通從此
全瓊肅清實爲異常出力在事文武員弁紳團兵勇應
懇恩施遵照本年四月初三日欽奉批旨彙案奏請獎
敘硃批據奏勦撫情形辦理尙屬周妥所籌善後事宜

著照軍營立功後積勞病故例從優議卹餘依議該部知道欽此

查辦匪鄉已有端緒摺

光緒十三年六月十三日

竊照粵省積匪糾結經臣之洞會同前撫臣倪文蔚奏明分爲三路督營查辦澈底清釐所有盜匪會匪鬪匪一體懲辦水師提督方耀分辦惠潮一路署陸路提督鄭紹忠分辦廣韶肇一路督辦欽廉防務前廣西提督馮子材分辦欽廉一路會同各道府督率委員將獲送各匪訊明分別懲辦光緒十二年二月十五日奉旨著照所請該部知道欽此嗣以各屬地方遼闊伏莽尙多

前奏三路所指各州縣係屬擇要舉隅此外各屬如有著名匪犯自應比照推廣一律查辦以期一勞永逸莠去良安又經分別咨行各屬遵照辦理臣大徵到任亦經嚴飭各屬會同營員認真查辦去後省東一路惠州屬海豐陸豐兩縣最爲凶橫不法久同化外水墘浚徑東洲坑沙港等鄉尤爲蠻悍該兩縣辦清然後惠州各屬有可措手茲准方耀咨報親督員弁兵勇於上年四月內行抵陸豐縣城分諭海豐陸豐兩縣設立公局遴選公正紳士入局辦事每鄉公舉鄉約正副房族正副責成稽查將歷年械鬪拜會搶擄劫殺等案匪犯按鄉

諭飭查拏細送派委參將何長清遊擊方沿蔡申方杜
丁惠良從九張志煥都司林飛鴻把總方億帶勇分駐
碣石南塘甲子大安河田等處查緝勒交十月內移駐
海豐縣派委降補守備方恭署海豐縣丞周運春從九
呂長庚已革副將莫善喜副將黃國安遊擊林進陞都
司李國清守備方記興帶勇分往青坑可塘捷勝仙美
公平梅隴赤石鵝埠等處查緝勒交歷九閱月迭據兩
縣各鄉遵交及營并拏獲各項匪犯劉亞拂等共四百
六十五名均據供認歷年豎旗拜會從逆攻城戕官傷
勇糾鬪傷人以及迭次搶刦擄禁誘拐出洋姦淫霸奪

等情復經詳詢鄉族實係素行不法凶暴眾著之匪經署惠潮嘉道益齡署惠州府知府夏獻銘督同審案委員候補同知增亮等覆訊明確錄供咨報就地懲辦惟應辦之匪過多其情節稍有可原者痛加懲責交該鄉紳約族長領回責令保結約束以前鬪案由委員會同地方官剖分曲直秉公處斷一律解息該兩縣匪徒抗官害民習爲故事亂萌已彰官法久廢此次痛加懲創一清積惡民情欣悅并詳擬善後章程嚴禁烏旗紅旗名目不令結黨搆禍追出霸奪財產添建書院九處義學四十三處嚴定鄉規均經臣等核明轉飭地方官認

眞遵辦並准咨報拏獲潮州府屬澄海縣已革生員楊春英等供認因抗繳沙田花息起意聚眾罷市糾邀積匪蔡亞柯等搶毀局廠挾制官長並究出蔡亞柯等另犯搶奪姦佔械鬪傷斃人命各案潮州民俗素悍近來已知奉法斷不宜使頑梗復萌經該提督馳赴澄海親督兵團拏獲訊明當將供認之楊春英等十三犯就地正法以昭炯戒其餘隨同滋鬪之蔡廷林等分別責懲發落眾論翕服現經商定該提督卽行移師惠州府城將歸善博羅長甯永安龍川連平河源和平等八州縣接續一律辦清此方耀辦理惠州海豐陸豐兩縣及潮

州府屬澄海縣匪鄉之實在情形也省北一路通稱北江以廣屬之三水清遠花縣韶屬之英德翁源連州屬之陽山及佛岡廳爲多匪而清遠一縣尤爲著匪所從出之區故去年與鄭紹忠商定將東路略加布置後卽專辦省北七廳縣親駐清遠居中調度西江之肇慶屬四會廣甯二縣附近清遠一併查辦茲准鄭紹忠咨報上年自赴惠州府與方耀商定辦法後歸途取道東莞布置一切隨卽移營駐劄清遠將佛岡英德翁源陽山花縣三水四會廣甯各屬同時舉辦派委三江協中軍都司朱輝煌候補遊擊常林三水營守備蔡珠署清遠

營遊擊江志署南韶鎮標右營都司黃忠保署連陽營
遊擊顏金候補遊擊王榮武都司陳達署四會營守備
劉成等各帶兵勇會同各廳縣督飭團紳查緝勒交就
中惟清遠之滘江司英德之潭頭鄉素稱盜匪之藪四
出爲害計鄭紹忠在惠郡歸善拏獲匪犯黃水嬌等十
三名在東莞獲匪黃扁頭才等十六名在三水清遠佛
岡等廳縣獲匪劉松等一百四十二名均經惠州府並
委員候補知府薛謙等悉心研鞫各供認迭次搶劫糾
鬪擄殺不諱稟經臣等批飭就地正法本年東北江行
旅暢通無阻此鄭紹忠辦理北江一路廣韶兩府屬匪

鄉之實在情形也特是廣屬地段太廣鄭紹忠難以兼顧且省城迤東之東莞增城兩縣距省甚近而東莞風俗最悍其毗連博羅之鐵岡鄉及望夏江邊等村積年劫掠械鬪擄殺拒捕抗官習爲常事又竹溪蓮溪二堡所屬各鄉历年兇鬪附近白濠寶塘及弱小各村附和幫鬪築臺架礮互相殘殺卽經添派署廣州協副將總兵鄧安邦前往專辦分東莞增城爲近省東路獲犯劉子寬等五十二名經委員候補知府嚴家疇等訊明供認迭次械鬪擄殺及行劫打單之犯稟經批行正法餘犯分別礮禁保釋其省西路肇慶府所屬沿江州縣地

居上游毗連西省歷年匪徒游勇攔江登岸劫掠商民
德慶州所屬之淶水村匪首陳定邦積慣窩匪銷贓出
貨主謀黨羽眾多以致四近河道盜賊充斥卽經派委
署肇慶協副將黃金福專辦西江水陸一帶計先後拏
獲匪犯梁亞楊等十名交肇羅道府覆訊明確稟經批
飭正法餘犯分別礮禁責釋其窩盜巨匪陳定邦等四
名提省訊明懲辦已歸入第九十五次盜案彙奏在案
現在西江水路肅清商旅稱便又省西南路廣屬之新
會新甯肇屬之恩平開平鶴山等縣偏在一隅壤地相
接河海交錯盜匪繁多自應別爲一路且新甯之新昌

引之書之卷之二
二
荻海二村匪徒最多歷年擄殺窩盜挖河爭利斂財糾
鬪其張逕等村甄李兩姓互相糾鬪擄捉殺傷甄姓男
婦多名兩村房屋數百間盡行燒燬又開平之塘朗村
械鬪習慣其著匪楊有興屢經拒傷官兵必須專員帶
隊圍拏節經先後派委陽江鎮總兵黃廷彪已革通判
徐賡陞都司司徒驥等督帶兵勇會同地方營員前往
查辦臨以兵威始陸續具結交匪計該員等先後共獲
匪犯譚亞高等一百零一名均經委員知府吳尙恭等
訊明稟報臣等批飭正法此近省東路鄧安邦省西路
黃金福省西南路黃廷彪徐賡陞分投辦理之實在情

形也其南海番禺二縣經地方文武隨時查辦計獲積
匪何亞福等三十六名均經廣州府知府孫楫督同縣
委訊明實係素行不法迭次擄劫殺傷之犯隨時稟由
臣等核飭正法各在案廉州一路靈山界連廣西闖案
盜案最多欽州濱海鄰越地方遼闊素爲匪徒游勇出
沒之所馮子材派委知府馮相華劉汝奇欽州營守備
賴連會等各帶兵勇會同各該地方文武督飭紳團查
緝勒交因馮子材駐紮欽州距廉較遠所有欽州境內
暨沿海獲到匪犯由署欽州知州李受彤審擬稟由馮
子材核明批辦其合浦靈山二縣拏獲匪犯由署廉州

府知府李璲審擬稟辦嗣馮子材渡瓊辦黎分留營哨會同地方官辦理迭准馮子材咨報並李璲稟報欽州九坡塘村農正廩等歷年據險滋事抗官拒捕形同叛逆經李受彤會同萃軍圍捕焚其匪巢殲斃著匪農正典等十一名擒獲農正廩等十五名訊明正法靈山平吉墟劉廖兩姓積年鬪殺多命焚擄不休築有礮樓閉柵拒捕經馮相華暨署靈山縣知縣鄧清圻等督軍圍拏攻破擒獲匪首劉相田並懸賞緝獲廖乃寶等七名發府訊辦又經李璲訊明由營縣解到合浦靈山匪犯廖二等四十三名均供認械鬪擄殺迭次搶劫節次稟

經臣等批飭正法情節較輕之犯分別礮禁枷責保釋
目前欽靈一帶漸知畏法此馮子材辦理廉州一路之
實在情形也以上各路自開辦起至本年五月止合計
共正法積匪九百零六名臣等伏查粵省各屬刦盜拜
會械鬪各匪日肆兇橫幾同化外此次奏派大員督兵
按鄉查辦紀律嚴肅各鄉士庶皆知此舉實係爲民除
害紳耆送匪均能踴躍從事方耀鄭紹忠馮子材皆係
各辦本籍情形既熟威信素孚所辦各項積匪大率皆
鄉族攻指網送或據控派員訪拏必其案據確鑿眾論
痛惡者始予正法其爲匪皆不止一年所犯尤不止一

案逃逸未獲之匪皆經榜列姓名懸立重賞購緝令其鄉族遠近周知即使一時未能遽獲亦斷不敢復回鄉里如此嚴加懲治洵足以安閭閻而快人心其已經辦清處所飭令各地方官選擇正紳嚴立鄉規隨時稽察約束舉報緝送荒陋獷悍之區酌設義學以期永臻安輯漸化頽風現在東路之海豐陸豐等縣西路之德慶封川高要東安西甯恩平四會等縣西南路之新甯開平恩平等縣北路之清遠三水英德花縣佛岡廳等處廉州屬之欽州靈山等處自去冬今春以來盜案頗稀鬪案漸息確係清查匪鄉之效惟廣屬南海番禺順德

香山新會等縣則盜案鬪風尙未甚戢且打單之風日熾由於近來港澳弊端愈出愈奇四出打單勒取重金以供巡役包庇之費且沿海諸沙居民寥落最易藏奸盜匪聚會分賊逃匿出沒多在此等處所現專設緝務總局所有省城暨附省南番香順等縣緝捕保甲團練統歸此局辦理派委奏調差委前浙江按察使陳寶箴會同臬司王毓藻總司其事前經奏明在案現將省城各項緝捕水陸勇丁歸併汰留申嚴賞罰添派輪船四出巡緝委員分赴各縣勸導城鄉力行團練並勸諭順德護沙約紳整頓護沙艇由官調遣以佐緝匪之用紳

民均屬樂從三數月以後當可漸有端緒至此次查辦
匪鄉在事文武員弁官紳緝匪勤奮訊斷詳審諸無枉
縱俾良民得以乂安應由臣等查明酌給外獎其從前
失察拜會械鬪罷市之地方官民徃於積習相沿官限
於兵力不足尙非有意疎縱相應仰懇恩施免其置議
硃批著照所請該部知道欽此

肇慶稅收加倍請分年購礮摺

光緒十二年六月十三日

竊照肇慶府黃江稅廠前因弊端太多經臣之洞奉旨
查明禁革各項規費改章恤商遴委山西候補知府陳
占鼐前往試辦並擬經徵之員若較原額正餘四項加

至一倍卽照異常勞績請獎其潮州府東關稅廠亦於此案內查明覆奏請定爲每年加解節省銀二萬兩所有肇慶稅廠除原額四項解足外所餘銀兩暨潮廠加解銀二萬兩併名爲額外節省防費暫以十年爲限十年之內不得輒請減免各等因於光緒十二年三月二十一日會同前撫臣倪文蔚具奏奉旨該督等請將肇慶潮州兩廠添解額外節省銀兩及肇慶稅廠改章試辦各節均著照所請行等因欽此並以省垣五門設防需增礮臺同日附片奏明請以此項節省防費專備五門分年購礮不准挪作別用每年將此款收齊訂礮布

置情形奏明一次奉旨該部知道欽此均經欽遵分別
飭辦各在案自該委員接辦後迭經臣等隨時督飭嚴
密稽查茲據委員陳占鰲報稱自光緒十二年五月二
十二日接辦起至十三年五月二十一日止屆滿一年
連閏十三箇月共收正稅盈餘等銀一十二萬二千二
百二兩七錢四分八釐查黃江廠每年應解正稅銀一
萬二千八百兩院司養廉銀三百八十餘兩羨餘銀一
萬五千九百五十兩加徵盈餘銀二萬兩橋羨銀一萬
兩遇閏加增羨餘銀一千七百餘兩共額解銀六萬九
百餘兩現計連閏十三箇月經徵銀一十二萬二千餘

兩係屬加倍除厰用於原定一成數內搏節支用計不及一成銀一萬一千一十一兩五錢三分四釐實解繳司局銀一十一萬一千一百九十一兩二錢一分四釐伏查肇慶關稅徵解久未足額臣之洞上年改章之時飭令原額正餘四項務照解足凡有所餘悉數歸公並將該府用度極力裁省約計每年額外祇期溢解銀三萬兩內外以充海防經費乃改章僅及一年除應解連閏銀六萬九百餘兩外竟溢解五萬有奇誠爲始願之所不及若非該員陳占鼇任勞任怨力除浮糜則積弊雖經禁革未必遂拔根株成效縱有可觀未必驟增鉅

款今收數既已加倍此後經徵各員無所藉口循此辦理不致仍前短絀且撙節廠用力顧解款實於粵省餉需大有裨益計前項新增節省溢解銀共五萬兩有奇併潮廠新增節省銀二萬兩上年奏案本係留充海防經費專爲五門購礮之需又該廠應解橋羨及加徵盈餘兩項共三萬兩咸豐以來久未徵解同治八年以後解至六成尙欠解一萬二千兩臣之洞上年查明覆奏責令該廠以後每年將此一萬二千兩解足此項亦係新增查核舊案橋羨加徵盈餘兩款係撥充水師燂洗戰船之費由外省支銷粵省師船年久失修近年燂洗

之費尙可酌量緩發所有此項新增解足銀一萬二千兩應一併添作買礮之用三項合計共銀八萬二千兩本年三月臣等校閱前路虎門中路黃埔一帶礮臺礮位尙未敷用且間有參用前膛舊式者必須一律改換新式長礮方收致遠命中之功上年十一月二十八日臣之洞覆奏汲水門六廠藥稅摺內請將粵海關節省六廠經費分年撥爲虎門礮臺之用部議核准今六廠藥稅改章此款無著仍須另籌又潮州汕頭海口形勢實以鰲頭馬尾馬矢三山爲最要自海防有事以來與鎮道各官考核詳審較之蘇安崎嶇舊臺尤爲扼要應

於此三處分築新式礮臺酌配巨礮十尊則潮防可臻
完固當經電致出使德國大臣許景澄與克虜伯廠議
妥擬購十五生三十五倍口徑新式長礮五十尊架件
全每礮一尊配彈二百顆實心開花各半棕色藥二百
出其價勻十年匯交礮亦十年分運計礮架彈藥四項
共需銀三百五十二萬四千七百四十六馬克外加運
費保險約二十萬馬克以現時馬克價折合共約需銀
八十三萬五千餘兩分作十年匯付每年約需銀八萬
三千五百餘兩以肇潮兩廠節省溢解防費每年八萬
二千兩計之適足敷用僅短千餘金尙易添足潮廠二

萬兩業有定額可循肇廠六萬二千兩但使責成委員實力稽徵當不致大有盈絀如或不敷礮價按年由外籌補明年礮到之後再當分年陸續接辦臺工並酌量分撥潮州各海口礮臺應用儻潮州尙有別款可籌亦隨時提撥湊支礮價以後仍每年於收款收礮後具奏一次據廣東布政使高崇基會同海防兼善後局司道詳請具奏並飭將委員陳占鰲照案請獎前來臣等伏查上年奏定肇潮兩廠額外節省銀兩充支海防經費曾經奏明專爲購礮而設茲擬訂購後膛長礮五十尊以之分布虎門五門潮州等處礮臺均爲必不可緩之

需現已咨商海軍衙門一俟咨覆核准後卽行電致許景澄匯價購定刻期運華粵省當萬分支絀之時而又不能不爲未雨綢繆之計惟有銖積寸累庶免臨時周章此款由蒐羅整頓而來且須經歷十年之久必須堅守成議始不廢棄前功至肇慶稅廠改章試辦一年連閏徵收加倍該委員陳占鰲實屬稽徵得力自應遵照奏案照異常勞績請獎合無仰懇天恩俯准將該員山西前充補用知府陳占鰲以道員仍歸原省儘先補用以示鼓勵

硃批該衙門議奏欽此

創辦水陸師學堂摺

光緒十三年六月十四日

竊惟古今人才皆出於學學之爲事講習與厯練兼之
近日海防要策首重水師兵輪次則陸軍火器外洋諸
國於水陸兩軍皆立專學天文海道輪算駕駛礮械營
壘工作製造分類講求童而習之畢生不徙其業是以
稱雄海上我朝聖武恢闔中國人材所萃將才何一不
備兵法何一不精特是時勢不同船礮機算諸端至今
日而巧者益巧烈者益烈若欲應時制變固非設學不
可近年天津福州皆設水師學堂而天津兼設武備學
堂以練陸師誠以二者不可偏廢也廣東南洋首衝邊

海兼籌應儲水陸師器使之材較他省爲尤急光緒三年前督臣劉坤一捐銀十五萬兩奏明生息爲儲養洋務人才之用光緒六年前督臣張樹聲撫臣裕寬於省城東南十里長洲地方就前款內撥銀建造實學館分派教習考選學生肄習西洋語文算法用項取之前次息銀特以限於費絀定額較少此外有關兵事諸端未能肆及臣之洞到任後察看該館生徒學業尙堪造就改名博學館於奏請籌辦閩粵兩省開設學堂各務摺內聲明在案臣等審度時勢公同籌商卽就其地改爲水陸師學堂並須添購地段增建堂舍以區功課而臻

完備其水陸師均各額設七十名先挑選博學館舊生
通曉外國語文算法者三十名爲內學生再遴選曾在
軍營歷練膽氣素優之武弁二十名爲營學生再擬選
業已讀書史能文章年十六以上三十以下之文生二
十名爲外學生無論生監俱准就學其水師則學英國
語文分管輪駕駛兩項管輪堂學機輪理法製造運用
之源駕駛堂學天文海道駕駛攻戰之法其陸師則學
德國語文分馬步槍礮營造三項內學生取其繙譯已
曉算法已諳營學生取其兵事已歷膽氣已壯外學生
取其志向已定文理已通惟營學生外學生兩途年齒

較長學習外國語文稍有不便應於洋教習之外添用華繙譯一名轉相解授以便領悟其房舍則分爲水師誦堂水師操堂陸師誦堂陸師操場陸師馬步礮操場其規制課程略仿津甌成法復斟酌粵省情形稍有變通大抵兼采各國之所長而不染習氣講求武備之實用而不尙虛文堂中課程限定每日清晨先讀四書五經數刻以端其本每逢洋教習歇課之日卽令講習書史試以策論俾其通知中國史事兵事以適於用在堂者一律仍准應文武試以開其上進之程其營學生外學生兩途年歲不必甚幼庶可辨其志趣氣質不致虛

養庸下之材語文但取粗通不必以此一端耗其心力
目力總期由粗入精必不使逐末遺本水師學成之後
撥入練船另設練船正教習槍礮帆纜教習測算教習
四員皆用洋弁在船課讀卽在中國沿海口岸遊行認
眞練習一年之後再選其材藝尤長者分赴外國學堂
兵船學習其陸師則三年學成後擇尤出洋分赴各國
學堂陸軍練習水陸均令每年九月在堂三月在船在
營遇有外洋有事擬照西國通例前往觀覽以資考鏡
實事現在購買地基添造學舍與築場厰約估需銀六
萬餘兩每月員弁薪水華洋教習薪費學生贍費丁役

工食約需銀五千兩按之津閩章程已屬節省堂中應用書籍機器隨時添置除博學館原有每年息銀六千餘兩外應於海防經費項下開支粵省度支極絀豈敢更增用款然此爲儲才要務不得不竭力成之惟學堂事屬創始總辦者非有熟習大員未易勝任查有二品銜分省補用道吳仲翔才識沉毅思慮精詳前充福建船政提調十餘年船政始規皆其創辦嗣經北洋大臣李鴻章調赴天津委辦水師學堂亦著成效現在請假回籍經臣等函邀來粵詢商一切相應請旨將吳仲翔發交臣等差委擬卽委令總辦水師學堂事務以資熟

手至洋教習擬用三員水師駕駛洋教習一員查有福
建船廠英員李家在閩期滿堪以調充陸師語文測算
兼操練正洋教習一員粵省現有德弁歐披次堪以充
補其副教習一員應由臣等咨商出使德國大臣向外
部選訂此外應設漢教習十一員水師則駕駛操演洋
文各一員華文三員陸師則英文幫教二員德文幫教
一員華文二員其稽查各堂及經管錢糧文案各委員
酌量任用此舉現經臣等詳加籌度飭據廣東布政使
高崇基會同海防善後局司道擬議章程詳請具奏前
來除咨明海軍衙門總理衙門暨戶兵兩部外謹合詞

恭摺具陳伏祈聖鑒

硃批吳仲翔著交張之洞等差委餘依議該衙門知道
欽此

續造兵輪摺

光緒十三年六月十四日

竊查粵海爲東南首衝不可一日無備海戰固須鐵甲
巨艦卽爲自守計而輔助礮臺扼截內港亦非兵輪不
可南北洋歲有各省關協撥經費或百餘萬或數十萬
用能寬裕經營船械具備而粵省無之歷年支持不暇
無從議及兵輪僅有巡緝供差輪船亦不甚大光緒十
年臣之洞到任之日已爲海防戒嚴之時事機緊迫患

在門庭海戰既無從猝謀內河自不能不備乃先其所
急籌款集工囑水師提督方耀前藩司沈鎔經試造廣
元廣亨廣利廣貞淺水兵輪四艘聊以資內河扼守之
具是年年底定議次年畢工曾經遣赴瓊州汕頭等處
近洋尙可駛行若風浪馳逐究無把握現在合計四淺
輪併舊有中小輪船共二十九號除分撥瓊廉應用及
各營要差外縣巡緝外省河內外止有十四號僅資緝
捕轉運之用至光緒十二年海防大定臣之洞欽奉懿
旨籌議海軍環顧海疆懲前毖後乃與司道將領百計
經營苦於無從籌此鉅款適據籍隸粵省之署廣州協

副將鄧安邦順德協副將利輝等稟請邀集文武官紳分年捐資廣造兵輪無事緝匪有事應敵自光緒十二年起到十四年秋間止可集銀四十二萬兩又經督飭運司勸諭鹽埠各商竭力襄助嗣據各商稟請分三年籌捐造船經費亦自光緒十二年起至十四年年底止可集銀三十八萬兩兩宗捐款皆據稱保衛桑梓肅清引地不敢邀請獎敘惟自造則萬萬不敷船小則又無大益乃於去冬姑先試造較大之淺水兵輪兩艘并函詢署福建船政大臣裴蔭森以歷年閩廠製撥南北洋各口輪船之長闊深淺駛行速率若何用資考較適是

時閩廠爲南洋代造三船均竣器全工暇遂商爲協造
辦法粵濟閩經費之不足閩助粵工力所有餘如此則
就此現有之款可造出海兵輪與臣大徵核計熟商并
飭司道等籌議僉以爲便於是定議協造鐵脇快輪一
艘穹甲快輪三艘共四艘擬名曰廣甲廣乙廣丙廣丁
廣甲馬力一千六百匹長約二百二十一英尺寬約三
十三尺有奇喫水極深處約十三尺有奇全船載重一
千二百九十六噸每半時約行四十七中里鐵脅木舢
製仿兵輪機器新式乙丙丁三艘均馬力二千四百匹
長約二百三十五英尺寬約二十七尺喫水極深處約

十三尺全船載重一千噸每半時約行五十五中里鋼脅鋼舢鋼礮罩穹甲斜厚一寸活桅兩枝能助鐵甲出洋攻擊自本年夏初起製約三十箇月以次完竣其廣甲一艘係閩廠已造之船本年九月可成駛粵應防共協銀三十六萬兩又協造河海並用中號兵輪四艘擬名曰廣庚廣辛廣壬廣癸每艘馬力四百匹長約一百四十四英尺寬約二十尺喫水約十尺每半時約行三十六中里鋼脅木舢鋼板鋼礮罩活桅兩枝亦可行大洋抵津滬自本年閏四月起製約十六箇月可成兩艘又八箇月可成兩艘共協銀一十二萬兩臣之洞先於

上年十一月委派前臬司于蔭霖員外郎熊方柏就黃埔設立船廠選匠開造淺水兵輪二艘擬名曰廣戊廣己每艘馬力四百匹長一百五十英尺寬二十尺喫水七尺每半時約行三十三中里鐵脅木舢鐵礮罩活桅兩枝足駛近洋內港限今年九月十二月次第工竣共需銀五萬數千兩其各船所需礮位甲乙丙丁四艘每船船頭十五生長礮一尊船尾十二生長礮一尊船腰荷乞開士聯珠礮二尊戊己庚辛壬癸六艘船頭十二生長礮一尊船尾十生半長礮一尊船腰桅盤荷乞開士聯珠礮共四尊彈各三百顆實心開花酌配棕色藥

餅照式配足除閩廠定購者撥歸粵用照付原價外其餘向克虜伯廠訂購粵省軍械局舊存聯珠礮十餘尊一併儘數湊配約計十輪礮械共需銀二十六萬兩通計船礮兩項共需銀八十萬兩已於三月閏四月六月陸續匯解福建船政衙門船價礮價共三十二萬一千餘兩船成以後擬將舊有巡輪酌量裁併大率裁去舊輪兩號可敷養新輪一號不致另增經費至帶船之員總以武職曾經歷練者爲主將來粵省兵輪擬選派明白勇敢之將弁充當管駕以收實效惟是此次所造十輪僅屬中等戊己庚辛壬癸六艘平日雖亦能出海有

戰事時止能守口巡洋甲乙丙丁四艘尙可在大洋助戰較之南北洋在外洋所購巨艦相去尙遠實由粵力已竭粵防難弛眾情激發集壤成山然猶集資寬以三年通工及乎隣省始克勉成此舉若欲禦大敵於重洋則必如臣之洞光緒十一年九月初四日具奏籌議海軍摺內所請水帶鐵艦三艘鐵甲雷船六艘併酌配快船方能自成一軍鞏衛瓊廉門戶然需款甚鉅應俟朝廷裁奪次第規畫施行至此十船中閩製者均可駛行南北洋將來造竣後當令駛赴天津聽候海軍衙門閱驗此係外籌捐辦不動庫款將來亦不請獎敘應請敕

部免其造冊報銷再臣等前於本年五月初旬欽遵四月二十九日懿旨電請海軍衙門核示旋准五月十三日覆電開十船成後裁舊養新尤合海署命意且係捐辦於經費無所出入又在奉旨以前卽由粵自奏等因合併聲明

硃批該衙門知道欽此

張文襄公全集卷二十一終

新城王樹森校

張文襄公全集卷二十二

奏議二十三

查明潯梧兩廠短徵稅銀請分別著賠寬免摺

光緒

十三年六月十四日

竊臣等接准戶部咨遵議廣西省潯梧兩廠短徵稅銀擬令勒限追賠一摺光緒十二年十二月二十五日具奏本日奉旨依議欽此原奏內開廣西潯梧兩廠稅課自同治十一年十月起至光緒十一年五月止歷任經徵之員共短徵銀七十六萬六千九百餘兩伏思關稅爲歲入常供不容絲毫拖欠本年據兩廣總督張之洞

查奏梧關經費病商摺內聲明每年商賈於正稅之外費至二十餘萬廠員例外苛求較正稅多至數倍則謂稅課不旺稅餘短絀其誰信之且梧關積弊如彼潯州壤地相接亦難保無前項情弊請旨飭下兩廣總督廣西巡撫嚴飭藩司卽將潯梧兩廠自同治十年十月起至光緒十一年五月止短徵銀兩在於歷任經徵各員名下按照任卸日期核定短徵應賠各數勒限追繳先將如何勒追之處詳悉開單限三箇月具奏報部該督撫同爲國家倚任大臣務當共濟艱難力任勞怨等因當經臣等飭行遵照去後茲據署廣西布政使周鶴核

明該兩廠短徵正餘銀數議請分別著賠寬免具詳前來臣等覆查廣西潯梧兩廠自軍興後稅課未能暢旺歷年短徵缺額尙係實在情形前因戶部指撥該兩廠應徵盈餘銀兩協濟黔餉歷經各前撫臣將兩廠正稅尙絀盈餘無徵情形奏明並將梧潯兩廠短徵正盈銀兩經徵各員無力賠繳援案奏請豁免經部議准各在案可爲明證比年因部撥兩廠稅銀以供邊餉每多徵解不前復經臣秉衡嚴切稽查督催徵收實難足額以致未能按期批解是該兩廠稅課歷年徵收短絀實非捏飾上年奉部行查歷年徵解款目又經臣等查明該

兩廠短徵正稅勒賠足額盈餘實無徵收分別賠正免
餘具奏在案茲准部議以臣之洞查奏梧關經費病商
摺內聲明商賈於正稅外費至數倍應令將短徵銀兩
勒限追繳在部臣慎重公款誠不爲過惟情節尙有可
原辦理應加區別祇宜整頓將來未能概追既往其中
實在詳晰情形有不得不瀝陳於 聖主之前者查盈餘
一項必須商貨甚旺於徵足正稅外尙有來貨可徵始
謂盈餘今梧廠經費出自商捐與稅課判然兩事同此
一貨旣已照則抽收正稅復於額外捐繳經費並非別
有貨物可抽盈餘銀兩是盈餘因貨多而有經費與貨

稅並行有正稅一兩而捐費一兩有餘或至二兩者故
工科徵至五六萬兩經費已至十萬有餘推原其故僉
言當日貨物稀疎不得不重抽其費以濟急需此足爲
商貨不多之據若稅課則悉按戶部則例徵收不能因
收數短絀輒有加增是以經費雖重仍與盈餘無涉至
臣之洞前摺所稱商賈每年費至二十餘萬係連書巡
丁役地棍船戶人等中飽之數而言聲敘甚明並非專
指經費一款其實在官所收經費不過十萬有奇而各
項支銷皆從此出溯查此項經費當時原因商人稟請
募勇保衛商船而設節節屯防節節護送所需餉械實

屬不貲追賊平勇數漸減而各前任撫臣卽已將經費陸續撥補正稅足額旋又令撥解公費且於正稅足額之外仍令賠繳盈餘三四成是已厯經設法規復正餘稅額而廣西土匪仍時竊發游勇散練所在劫掠隨時添募勇丁仍不能少至所收經費每年參差不齊旣非年年一律亦非徑歸私橐臣之洞原奏亦經聲明此項商捐經費撥補本廠正稅暨支給水陸勇糧并因西省院司道公費早年出自稅餘後因軍興稅絀改在經費項下動支等情奏明在案假使當時巡撫藩司若肯早加綜核勒令彌補盈餘未必不可撙節浮費以資挹注

乃失可爲之時而不圖視現有之財而不問今事過境
遷厯任各員大都病故丁憂參革黜降在西省者寥寥
無幾前旣無力賠補今雖督責嚴切參劾查抄恐亦終
無實濟而因臣之洞查奏各弊舉發無遺遂致窮追旣
往誠恐嗣後引以爲戒遇有此類事體相顧莫肯抉發
矣從前厯任督撫豈無見聞乃積弊相仍從未澈底查
奏正恐一發其覆督責因之貽累歛怨致興大獄故凡
積重之弊振之愈難實由於此似於疏壅除蔽之道不
無關繫且平心論之表正景直責在上司今不究厯任
撫藩專責厯任知府實不足以服屬吏之心若因此株

累遠年巡撫藩司追呼蔓延竊恐朝廷亦有所不忍臣等再四籌商確加體察竊以爲懲前毖後義各有歸事貴持平方昭大順先年潯梧兩廠盈餘或收未足額實係無徵皆非徵存虧挪可比而梧廠究有經費一款雖查無入已確據究屬不知撙節糜費惟有酌量再令著賠擬將每年額徵盈餘仰懇天恩俯准寬免十分之六其餘四成責令歷任經徵各員如數賠繳按照例限分別清完以示儆懲其潯廠稅項地較僻遠伏莽未清徵收尤爲短絀正稅缺額尙多迴非道光年間廣西未亂以前之潯州可比此等情形商旅皆知且向未另抽經

費與梧廠情形截然不同曾於上年三月二十一日附片奏明早經裁免解省公費撥補正稅足額在案若非實係短徵西省撫藩何必出此儻再令賠繳盈餘更屬無詞可措督責難施應懇逾格恩施將該廠厯年未徵盈餘概予豁免以示區別而昭平允臣等受恩深重當此籌餉爲難之際誠如部議分宜力任勞怨臣秉衡於該兩廠解省公費從未提用短徵之款又非臣秉衡任內之事無所用其瞻顧臣之洞於該兩廠積年弊竇澈底查奏抉摘無遺並力爲裁汰冗人禁除經費久已甘爲怨府此項各員短徵盈餘之款苟有可追斷不敢自

負初心意存見好實以今昔時勢不同各員無從措辦臣等今不能追恐後此亦更無可追者審度情形不得不仰邀格外之恩以存寬大之體且除弊之法要在寬其既往力杜將來此後潯梧兩廠除正稅外所有盈餘亟宜設法嚴加催督戶部經徵處分周詳無可更議惟有責成本省上司較爲切近而有實濟查西省每年奏撥餉銀四十二萬兩俱係計口授食實用急需部議准撥三十六萬兩尙少六萬兩現在用數實已苦加撙節萬難核減尙須續行奏請撥足臣之洞愚見竊擬將潯潯兩廠額定盈餘銀六萬兩此後卽請飭部撥充西省

軍餉以足四十二萬之數西省貧困已極此後西省撫藩待此支發軍餉耳目既近利害切身督催稽核自必不遺餘力似於國計商情兩有裨益

硃批戶部議奏欽此

量開河道口門與英使妥商交犯辦法摺

光緒十三年六

月十四日

查廣東由黃埔入省有水路兩支北曰魚珠南曰沙路上年辦理海防用船石橋樁將南支塞斷船隻出入統由北支全力防此簡要易施自防務解嚴後各國使臣領事屢請開通沙路迭經臣奏請敕下總理衙門立案

不予曲從誠以粵防攸關不得不守此成局以冀淤沙漸增用固吾圉乃年來在粵領事仍紛紛陳請各國使臣亦向總署曉瀆以洋船不能直達省河洋商受累爲辭務請開通沙路以利船商經總理衙門與臣內外堅持頻年以來極費唇舌不與通融而彼族仍紛紜不已上年七月接總署來咨深以兩年內之饒舌不能置之不理爲慮自是深思熟計之意本年四月經臣詳細聲復並以體察情形統籌全局如別有善法再當籌議舉辦等情函達總署在案誠恐將來難保不藉端要求似不可不籌一抵制辦法以爲量予變通之計查沙路攔

河共有三處一在四沙尾一在長洲後一在海心岡三者以長洲之橋爲最固計長二百五十餘丈純用大洋木築成開之尤未易易必不得已將來擬擇中央水深處開通口門十五丈兩傍加椿各兩排中納石塊日久挂淤當可漸臻鞏固至於有事時填塞口門應俟臨時相機料理其餘四沙尾海心岡兩處亦可做此辦法惟是當日攔截河道費盡心力工料不貲始克辦成今爲利便洋船許其開通則彼亦必有利便於我者相與對易方昭公允查年來粵省嚴緝盜匪所有著名大慝皆以香港爲逋逃藪向來到港提犯諸多爲難須有事主

眼證當堂質訊情節口供偶有參差犯之狀師卽爲開脫每提一犯須用狀師各費數千金猶不能必其交解實爲條約所無近日匿匪愈多窒礙尤甚擬請旨敕下總理衙門與英使妥商議立專條嗣後交犯務以兩廣督臣公文爲憑文到卽行交解無須事主質證不得藉端刁難彼如允從卽許以從權暫將沙路開通彼得便利英商之益而我收澄清盜藪之功似尙可以相敵雖於河道一節勉從其請略加變通於目前戢匪安民事宜不無裨益

硃批該衙門知道欽此

創建廣雅書院摺

光緒十三年六月十六日

竊惟善俗之道以士爲先致用之方以學爲本廣東廣西兩省地勢雄博人才衆多文學如林科名素盛惟是地兼山海東省則商賈走集華洋錯居西省則山鄉磽瘠瘴地荒遠習尙强悍民俗不齊見聞事變日新月異欲端民俗蓋必自厚士始士風旣美人才因之查兩廣總督舊治肇慶設有端溪書院爲總督課士之所兩省人士皆得肄業其中自總督移治廣州書院不能親臨考校整飭雖歲時封題課試規矩縱弛士氣不揚且原有齋舍止四十間大半敝漏不足以容來學每逢應課

大率借名虛卷草率塞責臣到粵以來兵事倥偬又值水旱爲災未遑及此比年海宇清宴民生粗安一切籌辦諸事宜規模略具兩省人士屢以整頓書院爲請當經委員會同肇慶道府勘議興修特以限於地勢該書院東鄰府學宮西鄰肇慶協署後城前市無從展拓且以肇慶山水峭急游學者少除肇慶一屬外他處諸生罕有至者官紳士林僉謂宜別有經畫設於都會於事爲便查省城粵秀越華應元三書院專課時文齋舍或少或無肄業者不能住院故有月試而無課程前督臣阮元所建之學海堂近年鹽運使鍾謙鈞所建之菊坡

精舍用意精美而經費無多膏火過少又以建在山阜
限於地勢故有課而無齋舍竊思書院一舉必宜萃處
久居而後有師長檢束朋友觀摩之益至於稽核冒名
代倩猶在其次且以上各書院多爲東省而設西省不
得與焉東省外府亦罕有應課者臣以文學侍從之臣
過蒙聖恩濫忝兼圻之寄才識迂紕無所建明至善俗
儲才之端職所當爲不敢不勉因於廣東省城西北五
里源頭鄉地方擇地一區其地山川秀傑風土清曠建
造書院一所名曰廣雅書院考江西白鹿洞書院湖南
嶽麓書院皆遠在山澤不近城市蓋亦取避遠翳雜收

攝身心之意廣州省會地狹人哢尤以城外爲宜計齋舍一百間分爲東省十齋西省十齋講堂書庫一切具備延聘品行謹嚴學術雅正之儒以爲主講常年住院定議立案不拘籍隸本省外省總以士論翕服爲主不得徇情濫薦調集兩省諸生才志出衆者每省百名肄業其中講求經義史事身心經濟之學廣置書籍以備誦習宋儒周子曾官嶺南著有德惠並無祠宇於義闕如今建祠院中并祀古今宦寓名賢本省先正有功兩粵文教者以示諸生宗仰肄業生額數東省廣州府三十名肇慶高州惠州三府各十名韶州潮州兩府各六

名瓊州府嘉應直隸州各五名廉州雷州兩府各四名
南雄直隸州三名連州羅定兩直隸州各二名陽江直
隸廳一名駐防一名連山赤溪佛岡三直隸廳共一名
西省桂林府三十名梧州潯州兩府鬱林直隸州各十
名平樂南甯兩府各八名柳州府七名思恩慶遠兩府
各五名太平府三名泗城府二名鎮安府一名百色直
隸廳歸順直隸州共一名遠郡下邑師友尤難各屬徧
及以示公溥豐其膏火每月兩課校其等差優給獎賞
道遠各府州分別遠近加給來往盤費總令其負笈佳
院靜心讀書可以自給免致內顧爲憂紛心外務院內

課程經學以能通大義爲主不取瑣屑史學以貫通古今爲主不取空論性理之學以踐履篤實爲主不取矯僞經濟之學以知今切用爲主不取泛濫詞章之學以翔實爾雅爲主不取浮靡士習以廉謹厚重爲主不取囂張其大旨總以博約兼資文行並美爲要歸不住院者不領膏火以便考其行檢無故不得給假以期專壹有成嚴立規條責成監院考察約束違者卽行屏黜欲其不分門戶不染積習上者效用國家次者儀型鄉里以仰副 聖天子作育入才之至意其書院常年經費所需甚鉅臣以厯年積存廉俸公費等項捐置其中並順

德縣沙田充公之款南海紳士候選道孔廣鏞等捐款
發商生息歲共得息銀七千一百五十兩查黃江稅廠
羨餘歷年卽以提充端溪書院經費自改章後徵收較
旺上年臣奏定三六平餘一項除支銷外尙有贏餘卽
於此款內每年撥銀五千兩又於紅鹽變價充公項下
每年撥銀五千兩撥款息款共歲得銀一萬七千一百
五十兩以充書院師生膏火監院薪水人役工食一切
祭祀歲修雜費至建造地價工料經順德青雲文社省
城惠濟倉各紳愛育堂各董事誠信堂敬忠堂各商聞
風鼓舞情願捐貲修造現已於閏四月二十日集款購

料興工約計十月可成當經札委兩廣鹽運司會同東布政司督飭委員妥爲辦理並飭監院教官妥議一切詳細章程稟定立案現經臣發題各屬諸生試以文字數首出色者卽行調取並咨商兩省學臣如有才志可造之士亦卽咨送竊惟易象有云君子以居賢德善俗言賢者會集則俗自化也論語有云君子學以致其道言同學講習則道易成也惟望從此疆臣學臣加意修明維持不廢庶於邊海風氣人才不無裨益其舊有端溪書院臣已檄飭道府酌提書院本款就原有規模修葺完整並酌加諸生膏火釐整章程以存舊觀學海堂

年久失修亦經飭司量爲葺治於原設專課生十名之外增設十名會課改爲每月一次責成學長申明舊日章程以期無廢前規

硃批該部知道欽此

遵保提鎮各員摺

光緒十三年六月十六日

竊臣於四月二十一日承准軍機大臣字寄光緒十三年四月初八日奉上諭各省提鎮大員均有專閫之責必須才略素優方足以資整頓邇來軍務較平尤應安不忘危物色將才用備任使著各直省督撫於軍營著續人員內無論實缺候補各就其人之才具或長於陸

路或熟於水師出具切實考語分別保奏其曾經引見發往各省差委之提鎮各員本欲令其練習營伍以備緩急並著隨時留心察看如有才識出衆之員一併奏保聽候簡擢各該督撫身膺疆寄以知人爲最要務當確切考察勿採虛聲勿徇情面用副朝廷訪求人才整飭武備之至意將此各諭令知之欽此仰見 聖主經武綏疆慎重閩寄之至意曷勝欽服查咸豐軍興以來將才蔚起指不勝屈此後邊海兼防較之內地戰事爲尤難專閩之才殊非易易如曾經與外洋接戰者或本有戰績近來又肯講求練習新式軍火礮臺戰船等事者

尤不易得廣東廣西兩省歷年辦理邊防海防將領雲
集其戰功之等差才略之長短皆已明白彰著臣三年
以來隨事考核證以公論凡該員等謀略膽氣操守紀
律一一確考默識每遇成績昭然緩急可恃者則必優
加敬禮傾心倚任激勸鼓舞以備國家干城之選茲奉
旨保奏謹就東西兩省實缺候補軍營差委各員中詳
加甄核擇其才識尤爲出衆者繕具清單切實注考恭
呈御覽再所保皆係長於陸路合併聲明 奉
硃批王孝祺等均著交軍機處存記欽此

謹將東西兩省軍營才識出衆之提鎮各員繕具清單

恭呈御覽

記名提督廣東北海鎮總兵王孝祺

該員忠勇老練簡重質樸推功讓能深明大體從前在淮軍多年歷著戰績前年鎮南關諒山之捷該員首率所部勤軍偕馮子材所部出關夜襲敵營隨卽扼守關前隘最當前敵疊次大戰破敵克城萃軍克捷多賴該軍犄角之力實爲功卓資深之將

記名提督婁雲慶

該員忠勇堅果紀律嚴明在霆軍將領中勛績久著前隨尙書彭玉麟來粵辦防建議扼守沙角礮臺銳

然自任獨當外海首衝臺工堅實規畫精詳實爲緩急可恃之將

記名提督熊鐵生

該員閔深勇猛才略優長素稱霆軍健將前隨彭玉麟來粵分守沙角各臺任事伉爽訓練精熟紀律極爲嚴整可當大敵

記名提督陶定昇

該員誠篤勇往廉明恤士久在老湘營中合字營立功前經彭玉麟奏帶來粵分防南石頭蒲州各礮臺治軍練礮事事盡心

記名總兵劉樹元

該員勇決鎮靜不避艱險久在湘軍立功經彭玉麟奏帶來粵分防虎門外大角蒲州礮臺迅速節省馭軍整嚴有法

補用總兵奏補廣西慶遠協副將董履高

該員端重勇勁深悉兵機歷在淮軍立功前在關外谷松威坡等處禦敵諸軍不支之時獨率一軍力戰骸骨被礮打折調治年餘始獲痊愈現經調至廣東統帶廣勝軍治軍嚴肅訓練精勤

記名提督廣西右江鎮總兵張春發

該員驍勇精詳能謀能戰關外戰功卓然爲定邊楚軍中將領之冠衆論僉同

記名提督蕭得龍

該員勇鷲謹嚴衝鋒堅守皆其所長久在湘軍從征西路卓著戰績上年在關外立功名亞於張春發

記名提督貴州安義鎮總兵蔣宗漢

該員膽略俱優能耐勞苦係已故提督楊玉科得力部將南關之戰厥功甚偉

記名提督謝鴻章

該員志遠氣銳曉暢戎機前在黔軍立功已經借補

貴陽營右營遊擊海防緊急時自請開缺來粵效力
貴州撫臣奏明奉旨允准現委辦瓊州撫黎開山事
宜條理精明實爲武職中不可多得之員

再請開缺回籍調理摺

光緒十三年六月十六日

竊臣前因假期屆滿病難速痊懇恩准予開缺回籍調
理本年五月十四日差弁齋回原摺奉硃批著再賞假
一月毋庸開缺欽此恩慈曲逮感悚難名當卽趕緊延
醫調治冀得速痊所有地方及交涉事件仍須黽勉籌
辦神智愈鈍休暇愈稀瞬經一月所患肝鬱氣痛怔忡
眩暈等症有增無減精神委頓不支接見僚屬語言稍

多輒覺舌強氣喘醫者云心血虧耗太過若非屏息勞
煩培養元本斷難就痊臣以一介腐儒受恩深重捐糜
頂踵不足云酬特念病日增困久妨賢路心思既竭無
補時艱自憾早衰徒滋負疚惟有再行籲懇天恩俯准
開缺回籍調理另簡公忠大臣來粵接任以免貽誤臣
獲卸仔肩庶得留心攝衛惟冀蘇沈疴而圖後效非敢
安偷惰而外生成至目前緊要事件仍當力疾會商東
西撫臣辦理

硃批著再賞假兩箇月無庸開缺欽此

再陳澳界膠葛立約必宜緩定摺

并清單
光緒十三年七月二

十八日

竊惟中國與葡萄牙議立新約一事臣於三月內承准總理各國事務衙門來咨當經臣暨撫臣吳大澂各抒所見奏請從緩定約奉硃批該衙門知道欽此六月間疊准總署來電查詢澳地關閘以內華民詞訟案件是否仍歸地方官審理旺廈村等處田糧每年實徵若干歸葡人收租者若干等因當經密委廣州府知府孫楫候補知府富純署香山縣知縣張文翰前署香山縣知縣蕭丙堃候補知縣蔡國楨等分別確查旋據查明七村訟案錢糧仍歸香山縣管理并查明洋藥來華分運

實與澳門無涉業經據稟電復並分別咨達兩達總署
商辦在案撫臣於七月十六七八等日親赴澳門水陸
一帶履勘目擊情形旋省後與臣反覆籌商大率澳門
一帶有葡人原租之界有三十餘年久占之界有十餘
年來新占之界有近數年圖占未得之界區別甚多實
非一致現當立約之際彼必將含混貪求若使稍不詳
審則遠慮近憂處處棘手除前奏所陳可慮七條之外
敬敢縷晰再爲我 皇太后 皇上陳之查旺厦一村
歲完糧銀糧米共銀三十餘兩其餘沙岡新橋沙梨頭
龍環龍田塔石等六村依山而居並無田糧葡人先於

各處強設路燈藉收燈費漸向各村強編門牌勒收地租旺廈村全不交納龍環塔石兩村不繳者十之六至詞訟案件其口角錢債細故或由葡人就近處理若人命重案仍歸香山縣控告辦理甚至圍牆以內遇有重案往往由洋官照會香山縣歸案審辦此皆咸豐同治光緒年間之案均有案牘可稽是澳門一島牆內土地人民歷年並未專歸葡人管轄牆外可知屢次紳民呈詞深以入洋籍輸夷賦爲恥情詞憤激不約而同上年葡人勒收租鈔旺廈村民鳴鑼拒之立即遁去強者固抗不完交弱者亦從違各半此次撫臣到澳接見各村

各島居民男婦老幼萬餘人相率環觀咸頌皇仁歡呼
感泣察此情形若明歸葡屬各村各島斷不甘心此民
不服葡一也關閘乃前明所設以其地勢險仄設守於
此國朝因之以南圍牆以北七村仍是我疆並非將閘
南之地皆予葡人道光季年以來逐漸混占修路築臺
直抵關閘且藉設燈救火諸事勒向海中諸島收繳燈
費地租建造洋房數間於大拔島迤西之山尾當十字
門內築一墩臺又至澳西隔海灣仔銀坑等處勒收船
租地租民拒不繳今若立約彼必將關閘內七村及潭
仔過路環諸島攘爲己有甚至隔海灣仔銀坑一帶皆

生希冀此貪得無厭二也澳門之南山島對列內外兩重名爲十字門內重左山名大拔島其有村落可泊船處名潭仔右山名小橫琴島外重左山名九澳右山名大橫琴島其有村落處名過路環其島大於澳門六倍潭仔居民約二百戶漁船極多丁口四千餘過路環居民約百餘丁口二千餘餘兩島居人甚少查高廉雷瓊四府民船來往之路正在澳門之南潭仔過路環之北其過路環之外卽係大洋輪船可行民船難行若澳門屬葡則粵省西四府民船皆須穿過葡境是將西路自行阻塞此海道有礙三也澳門北面陸路一綫與內地

相連長約二里寬僅百步名曰蓮花莖恰肖其形關閘
卽扼其上葡人久蓄詭謀欲將蓮花莖西面一帶填平
直接前山寨同知治所岸外計向澳門西北展出之地
長約九里半寬約二里半如此則所占更出關閘以外
不惟貪妄無理而且險要全失此次撫臣到彼稅司法
來格呈出一圖畫有紅綫縱橫數十道皆葡人現擬填
占之界實可駭異此奪我險要四也朝廷所以允以澳
予葡者爲其協查洋藥稅釐也今據委員等確查稟稱
洋藥自海外入中華皆徑到香港分運各口從無徑運
澳門卸貨之船是稽查之關鍵在港不在澳葡人卽包

攬走私澳門一隅所銷有限尙可於澳外水陸兩途分
防嚴緝查英國助我稽查洋藥現屬試辦並非一定不
易之法萬一三數年後章程改變香港不能嚴查澳更
無能爲功此得之無名五也不惟此也稅司法來格向
委員知府蔡錫勇言現因潭仔過路環兩處及十字門
一帶海面葡人妄謂係葡之海界以致我之緝私諸多
不便等語現在已經妄占作梗若立約屬葡其阻礙自
必更甚不惟洋盜鹽梟內地出洋各匪無從捕截卽以
洋藥論不惟無益於緝私而且正有害於緝私此求益
反損六也英國圖澳之意已久嘉慶十三年曾有兵船

占據澳門礮臺謀奪葡利之案經奉旨用兵驅逐而後去英得香港後此意乃息今若以澳予葡他國已難免覬覦且此議倡自英人恐英尤必設法攘之查葡欠外國借款現已五千三百餘萬鎊將來或折債抵換或通融借用俱在意中港澳通連水陸受敵粵省海防何堪設想此徒資強敵七也從前商口未開洋舶入華皆在澳門停泊葡人獨據互市之利故有奏准設立商船二十五隻自英得香港立爲馬頭澳門貿易頓減商船並無一存租界內之洋房大半現皆賣與華紳華商爲業近數年澳門旣失闡姓之利葡人益形貧窘每年入不

敷出養兵止四百名各臺皆係前膛舊礮經費猶患不足於是勒索附近華民鈔費華船漁租民多不從若視爲屬地强行制縛苛歛旺廈諸村及潭仔諸島居民累萬必與葡人爲難葡人必受重創一經決裂轉難收拾此別生枝節八也伏查澳門一區久爲粵省肘腋之患自道光咸豐以來洋務紛紜內患未靖無暇議及彼遂蒙混多占得步進步乃歷來無人禁制非果葡之強盛不能禁制也臣到粵後卽首將閩姓之利收回上年春間臣據旺廈村紳民呈稟卽經密札印委各員疊次密查一面照會葡官禁阻一面繪具地圖考核葡人虛實

兵食商務情形並每年粵省接濟澳門米穀若干經由何道以爲清理防遏之計並於紫泥關設卡稽查走私蠶繭以免土絲之利歸入澳門疊經咨關行司飭局籌議有案然非籌定辦法奏奉諭旨不敢輕易發難其時以東西兩省越邊界務未竣未便同時並舉擬俟越界既定卽當奏陳先已於本年三月內咨達總署密籌辦法嗣接到立約明文隨卽通籌利害條列具奏今覆加詳查民情之憤後患之深如彼於藥徵之無益有害又如此竊謂詳約總宜緩定俟年餘後體察藥徵旺淡究竟若何再行請旨定奪如彼非理要求或竟作爲罷論

七月十三日復准總署來電慮及此後更有侵占及轉屬他國兩節令熟籌杜之之法所慮誠關緊要臣熟加籌度若杜絕侵占一節其圍牆以外關閘以內葡人所自已成之馬路洋墳花園似可聽其自然不必拆毀至於牆外閘內之兵房礮臺如能收回固善卽聽其存留亦尙無大礙至於七村民居民田總當劃清界址豎立碑石已占者仍作爲租界既經免其租銀或作爲借居之界未占者作爲官界不得踰越其澳門本島以外之潭仔過路環兩處必與理論雖有修成礮臺洋房石路塔燈等工或酌給修費與之贖回或已占者准其暫行

租居酌定年限獨近逼潭仔正當十字門之礮臺必應歸我未占者我亦安營設汛以資鈐制應俟臨時相機妥籌斷不容其占有諸島其灣仔銀坑一帶與澳隔海與香山縣土地相連斷不准其覬覦至蓮花莖以西填地遠過關閘直接前山之詭謀則豫爲揭明禁止絕其妄想青洲一墩自前明已建洋寺爲地甚小應議明不准填地連接總之除原租圍牆以內之地仍舊聽其居住外已侵占者明示限制察其於我有無大礙分別租給收回未侵占者力爲劃清嚴加防範其海面按照公法與之議明不容擅占以後只須責成地方文武隨時

認真稽查派兵輪常往巡哨督撫提臣每季一巡卽不致再有侵占儻蒙朝廷主持總署定之於內疆臣必當守之於外卽如俄法強國邊界旣經勘定亦必期永遠循守何況於葡蓋清理從前之侵占則須分別酌辦若杜絕以後之再加侵占粵省之力尙可辦到亦斷不至因此致生衅端者也至轉屬他國一節旣已屬葡則彼可自主若仍爲華地卽與沿海各省地面無異中國威力遠勝葡人他國非有意外開衅決不能憑空盜據似可布告各國聲明免其租銀借與永遠居住以示地主有屬譬如賃屋假館之客固不敢轉贈他人卽他人亦

不能強行估買防維較易爲力若旣已正推解之名又欲施控制之計竊恐更費周折矣是欲杜轉屬之弊尙不如仍舊之爲愈也總之澳無田地其米糧皆係由香山縣石岐等處接濟並違禁私運出洋澳販恃爲大利若米船數日不到立形困窘葡無商利專恃勒抽華民以資用度入不敷出每年僅解繳該國銀二萬餘兩已形竭蹶葡無駐澳兵船僅有租來他國兵船一號泊於海中餘有小巡輪數隻而已其陸路礮舊兵單迴非他國洋兵之比以彼貧弱如此我並不加驅逐彼原租者聽其安居久占者量加區別新占者設法清理未占者

明文杜絕彼方當深感聖朝怙冒之仁斷不至與中國
啟衅竊惟此次藥徵改章赫德所自任者不過歲增二
百萬澳門一路協助之益已屬無多若澳爲葡有已屬
得不償失況協助未必得力乎至總署來電慮及葡使
坐待一節該使之意蓋恐非常之惠遲則生悔又恐中
國察知洋藥之效於彼無功則事將中變以故亟於請
盟彼利在急則我利在緩可知煙臺之約遲十年而後
行澳門之約豈能責我數月而遽定伏望聖明垂察將
臣前奏并此次所奏各節敕下總理衙門妥籌詳議緩
與立約免致民情梗阻別生枝節粵省幸甚 奉

硃批該衙門知道單圖併發欽此

謹將澳門詞訟案由錢糧數目葡人租銀人數敬繕清單恭呈御覽

計開

詞訟

一咸豐十一年十月西洋理事官獲解致死鄒亞俸兇犯陸亞邦移請審辦一案

一同治元年七月西洋理事官獲解致死有孕媳婦及孫二命兇犯洗開和移請審辦一案

又西洋理事官獲解將其養女推壓入海淹斃犯婦樊

蘇氏移請審辦一案

一光緒八年十月黃祺呈控吳遜如貪租背約一案

又梁騰芳呈控蕭啟琛抄搶貨物一案

一光緒十二年八月吳逢昌呈控郭宏章串夷抄搶一案

又黃朝輝呈控何怡翰私頂串跳一案

田糧

一仁一圖末甲僧建城共稅三頃七十七畝八分五釐

一毫

內稅一頃五畝在望廈村餘在界涌左右

額征銀一十二兩三錢三分

米一石八斗六升八合

又僧慶壽共稅六畝三分零九毫額征銀二錢八分米

三升三合

一審一圖末甲張保和共稅七十五畝零二釐二毫內稅

三十餘畝在望廈村額征銀一兩零四分米一斗一升八合補升

銀一兩五錢六分米六斗一升四合

又胡徐亮共稅三十六畝一分九釐一毫額征銀一兩零八分米一斗四升

一良二圖八甲李承蔭共稅五十五畝零二釐五毫俱在

望廈村額征銀一兩六錢二分米一斗五升二合

一良五圖一甲沈大任共稅三十八畝二分九釐額征

銀一兩二錢五分米一斗八升

一良七圖四甲何大昌共稅一頃四十二畝三分九釐九毫額征銀三兩六錢八分米四斗四升八合

以上七柱共征銀二十二兩八錢四分米三石五斗五升三合銀米合計共銀三十餘兩

一望厦村舖戶民居篷屋大小四百餘間壯丁千餘人田四頃零不繳租鈔

此外各村概無田畝

一龍田村舖戶民居大小七八十家壯丁百餘人龍環村舖戶民居大小三四十家壯丁七八十人約半繳租鈔每戶自半元起至三元止不等

一水坑尾除進教圍外舖戶民居篷屋七十餘家壯丁
二三十人搭石村除進教圍外舖戶民居篷屋四五十
家壯丁七八十人每年約繳公鈔及街燈費共銀三百
元

一沙梨頭村舖戶二十餘家民居三百餘家壯丁四五
百人每年約繳公鈔及綠衣街燈等費共銀一千餘元
一沙岡村舖戶船廠灰爐六十餘家篷屋三百餘家每
年約繳公鈔及綠衣街燈等費共銀一千餘元

一新橋村舖戶二十餘家民居二百餘家壯丁二三百
人每年約繳公鈔及綠衣街燈等費共銀一千餘元

張之洞全集 卷二十一
一三巴門外石牆街舖戶三十餘家民居一百餘家每年約繳公鈔街燈費共銀一千餘元

一潭仔舖戶船廠六十餘家民居篷屋一百餘家壯丁二三千人每年約繳綠衣街燈等費共銀一千餘元葡人勒收地租丁口每人半元遇有紅白事又勒繳租銀該處迄未照繳

一過路環舖戶船廠四十餘家民居百餘家每年約繳綠衣街燈等費共銀一千餘元未繳租鈔

又潭仔過路環約有拖船八百餘隻每隻寄泊一次收銀二元二角半每年約銀二千餘元葡人於此二處派

有陸路綠衣兵三十四名

潭仔二十名過路環十四名

又小輪渡船

兩隻

查全澳舖戶民居並附近各村每年約共公鈔銀二萬四千餘元地租銀一萬二千餘元

計澳門各村各島丁壯約八千餘人男婦老幼約共一萬數千人

又查葡人不及千名兵丁不及四百名唐人綠衣不及百名兵船祇一艘另教民約二百名

設局清查沙田酌擬章程摺

并清單

光緒十三年七月二十八日

竊照廣東欽遵諭旨查辦沙田升科經臣之洞援照勘

辦山西豐甯官荒馬厰成案奏請敕部頒發空白沙田執照於上年十一月間派員領賫回粵並前准戶部咨一俟辦有端倪卽將如何設局清丈如何預限升科如何追繳花息一切章程開辦日期委員銜名先行報部備查等因當經飭行妥籌舉辦去後茲據廣東布政使高崇基會同沙田總局司道詳稱伏查濱海沙坦爲天地自然之利積年閱歲子母相生工築滋培連阡累陌雖經疊次查辦大抵皆就司冊之可稽者分別籌捐而溢坦之隱匿如故現經奏明仿照豐甯馬厰成案辦理由部頒發執照一萬張來粵民情可資鼓舞查廣東沙

田以廣州府屬爲最多潮州府屬亦間有之當飭廣州府知府孫楫添派委員在省設立總局由該司道督率該局員等詳察檔案悉心鉤核並在南海番禺香山順德新會東莞等縣各設分局遴委明幹之員會同各該地方官及紳士於上年十一月起次第開辦其潮屬則由會潮嘉道潮州府督飭各該縣印委紳董設局查辦體察民情尙無異議惟沙坦爲利之所在匿報者距久耕之坦已承者利輕則之糧富豪視蔽匿爲固然奸棍復譸張而嘗試查辦不慎流弊滋多該司道督率局員酌中定章於腴田則按則加升於虛稅則准其報豁於

溢坦則酌減花息以徠自首於老沙新沙則各議繳款以示區分至潮州沿海沙坦多係鹹水與廣州沙田腴瘠不同尤應查照舊案分別辦理以示體恤緣清丈造端宏大需款繁多必宜寬爲籌備仍力求撙節核實動支如有盈餘花息加升之款一律充餉至頒發部照之時新沙業戶報案具存自可飭將原領司照繳呈換給惟老沙年分深遠民間歷經展轉分拆售賣畝數不免畸零屆時給照或須稍示變通容俟體察情形酌量辦理從此經界既正各安其業既除兼并虛稅之弊亦息構訟械鬪之端似於國賦民生均有裨益至此次查辦

沙田舊案膠葛太多積習把持最甚清理極爲不易全
須在事各員紳不避勞怨一秉公平使民間樂於從事
查山西豐甯馬厰成案係照異常勞績奏請給予獎敘
業經奉部核准在案此次清田益賦事同一律而事體
紛煩收數較鉅其繁難則更過之應請先行援照奏咨
立案如辦有成效准照異常勞績請獎以期奮勉并將
酌擬章程八條詳請具奏前來臣等覆核無異除咨部
並將委員銜名隨時報部備查外所有設局清查沙田
情形暨酌擬章程理合繕具清單恭呈御覽奉
硃批戶部議奏單并發欽此

謹將設局清查廣東沙田升科分別繳款換照酌擬章程八條繕具清單恭呈御覽

一查勘沙田擬飭先報後丈也業戶所有沙坦令自赴各該縣局呈報如有田浮於稅未經報承者准據實自首仍歸管業如延不自首卽俟各業戶報齊後由委員逐段勘丈如丈有溢坦或經人指控卽將溢出田畝召變充公以示懲儆

一首報溢坦擬酌減花息也業戶報呈沙坦舊章成熟已久者上則繳銀八兩下則六兩草白坦三兩乃業戶以繳價過鉅因之隱匿不行具報現擬格外從寬如係

自首者准將花息酌減上則六兩下則四兩草白坦二兩勘明後分別給照定則升科起徵以後不得援以爲例

一已升老沙擬一律清查也已由斥鹵加升銀米者是名老沙既經照番禺上則完納本可無庸查辦惟新沙由老沙接漲若專辦新沙則民間將以老沙爲影射之地易滋蒙混現擬統行清查飭令呈繳契照如畝數相符無庸清丈者另案核辦若田浮於稅必須清丈方能明晰者飭令酌繳經費以資貼補

一斤則沙坦擬分等繳款也現完斥鹵輕則各田成熟

已久早應加升銀米而隱匿多年積數較鉅若令按年追繳業戶力有未逮查光緒七年斥鹵補升議令每畝酌完應升銀米銀一兩充作海防經費現擬從寬已繳過海防經費者飭繳清丈經費銀五錢未繳海防經費者飭繳欠糧銀一兩清丈經費銀五錢以示均平

一補升田畝擬照各縣稅則辦理也查斥鹵沙坦年久成熟原案皆照番禹上則補升銀米但地土之肥瘠不同各縣之徵收有異若強而爲一民情多有未便故自嘉慶二十三年以後續辦升科之案甚屬寥寥現擬酌量變通分別等則按照各該縣稅則編徵給發部照如

有以熟作荒以高作下者一經查實卽照欺隱田糧律究治惟查原領部照當時祇有上中兩則字樣未經聲敘下則體察情形不無觀望擬俟辦有成效再行續請頒發下則照以資填發

一原報虛稅擬概予豁免也舊例報承沙坦統以自首之年升科如有坍者題請豁免惟業戶初承報時往往約畧多報以冀將來成熟內有日久尙未成田者土豪遂藉此印照虛糧影佔新生溢坦自經此次查辦後所有虛稅應予一概豁免又從前未變屯坦其時因半係虛額故尙有未變之稅四百餘頃現爲日久其間有

無成熟亦擬一律分別查辦均按照田畝實數填給部照以清賦稅而杜侵佔

一沙田升科擬隨時分起咨部也各沙查清給發部照自應全案告竣始能造冊達部惟此次清查係爲一勞永逸清釐賦稅起見一經查明給照若不隨時咨部則耽延日久適啟業戶觀望之心現擬查照光緒七年奏准成案隨辦隨咨一俟業戶清繳銀兩覆勘明確填發部照取具圖結到司按起分別新升加升具詳咨部並將照根隨送聽候查核以免積壓而示民信

一潮屬沙坦擬分別辦理也潮州沿海沙坦多係鹽水

雖築成圍基驟難盪滌該處居民向多圈作魚塘不盡
成田種穀本省成案於潮屬沙坦間有酌捐從未澈查
是以厯次未經議及此次請發部照潮屬業戶聞風樂
從亦願一律查辦現擬體察情形量加寬減以示體恤

張文襄公全集卷二十二終

紹興孫家棟校